

11 JAN 2003

China-Lawatan/I

CHINA SEDIA KEMBANG KERJASAMA DENGAN MALAYSIA

KUALA LUMPUR, 11 Jan (Bernama) -- China sedia mengembangkan kerjasama yang saling menguntungkan bersama Malaysia, kata Naib Perdana Menteri Li Lanqing hari ini.

Beliau berkata kerjasama seperti itu juga akan membawa manfaat kepada kedua-dua negara dan menyumbangkan kepada kerjasama lebih erat di kalangan negara-negara membangun.

China dan Malaysia adalah dua jiran mesra, kata beliau dalam teks ucapannya yang difaks ke Bernama di sini. Beliau berada di negara ini bagi lawatan rasmi empat hari atas jemputan Timbalan Perdana Menteri Datuk Seri Abdullah Ahmad Badawi.

"Kita mempunyai banyak kepentingan bersama. Hubungan dua hala dan kerjasama dalam bidang politik, ekonomi dan perdagangan, saintifik serta teknikal, pendidikan, budaya dan bidang-bidang lain semakin berkembang," kata Li.

"Kita juga telah menjalin hubungan dan kerjasama yang baik dalam isu-isu antarabangsa dan serantau," kata beliau lagi.

Malaysia, katanya salah satu daripada anggota penting Asean dan China mementingkan hubungannya dengan Kuala Lumpur.

Semasa berada di sini, Li akan mengadap Yang di-Pertuan Agong Tuanku Syed Sirajuddin Syed Putra Jamalullail dan juga telah bertemu dengan Perdana Menteri Datuk Seri Dr Mahathir Mohamad dan Timbalan Perdana Menteri Datuk Seri Abdullah Ahmad Badawi.

-- BERNAMA

CL RV PR